

Mai pi finiria
 S' i steis a contè
 Tut lo ch' i seu ancor,
 Saria 'n stupor.....
 Ma m' ven, ecc.

Le Vedove.

CANZONE XXXVIII.

A j' è tante vedovele,
 Pr parlè così an comun,
 Ch' a procuro d' fè le bele
 Pr tornè a gabè quaicun;
 Ch' a procuro d' fè le bele
 Pr tornè a gabè quaicun.
 Mi m' antendo di dle giovò,
 Pa dle veje bombonà,
 Coule ij lasso ste ch' a brovo
 Ant 'l breu dla carbonà.
 Coule, ecc.

L' an 'l veso ch' ai tormenta,
 Ch' ai fa andè fora d' servel,
 Una smania, l' altra stenta
 A podeje ste ant la pel.
 Una smania, ecc.

A fan tuti ij stratagema
 Pr podeje otni so intent,
 Povre done, l' an pa d' flema,
 E bin poch regolament.
 Povre, ecc.

A faran bin le svergnose
 S' ai ven quaich proposision;
 Ma l' an maitas d' esse spose
 Pr guari dla smangision.
 Ma l' an, ecc.

A fan bin dontrè grimasse
 Pr quaich di vidoe ch' a son,
 Ma son tuti tir d' volpasse,
 Pienne mach d' simulassion.
 Ma son, ecc.

Mi n' ai conossù quaicuna
 Dnans che 'l so mari fuss mort,
 Caparesse dunna dunna
 Un autr om pr so confort.
 Caparesse, ecc.

Venta vede a cinfrognesse
 Dlongh ch' a l' an furni coul deul;
 A s' ingegno pr butesse
 A l' incant s' quaicun ai veul.
 A s' ingegno, ecc.

Osserveje com' a viro
 Pr le gesie ant j' ocasion;
 Ma savi i motiv ch' ai tiro?
 L' è pa gnanch la divossion.
 Ma savi, ecc.

L' è pr fè la soa parada,
 E pr esse vaghegià,
 E fè vede a la brigada
 Ch' a son leste e desgagià.
 E fè, ecc.

Van e giro d' ogni banda,
 Pr le piasse e le contrà,
 Prchè j' è pi gnun ch' ai comanda,
 Nè ch' ai rompa le soe strà.
 Prchè, ecc.

S' a son riche, s' a son bele,
 L' an cinquanta galavron
 A frusteje le pianele,
 Le cadreghe e cadregon.
 A frusteje, ecc.

- E lor gonfie e sostnue
 L'an piasi d' fesse amusè,
 Ma quaich vota le pi drue
 Dan del nas ant un busè.
 Ma quaich, ecc.
- S' a son brute e lingerote,
 A van squasi fora d' lor,
 Venta vedie mnè le piote
 Pr serchesse 'n sfojor.
 Venta, ecc.
- Elo nen una vergogna
 Vedne andè basicoland
 Tuta la giornà an gatogna,
 E la neuit pr li gnaugnand?
 Tuta la, ecc.
- Ai na j' è ch' ai fa pa penna
 A chitè le soe masnà,
 Basta che 'l parti ai convenna
 Pr ciapelo a la volà.
 Basta, ecc.
- La pi part (i peus di ancora)
 Ch' a son tant acalorà,
 Ch' a sciodrio ant un quart d' ora
 Vint dosenne d' euv d' pondrà.
 Ch' a, ecc.
- Tut coul an che 'l deul a dura
 J' è dco vis ch' a l' è un gran guai
 Nen podeje fè figura
 Ai teatri, nè sui bai.
 Nen podeje, ecc.
- Fin ch' an somma a torno aveje
 Un autr om, l' an mai pi pas,
 S' ai doveissa bin fiacheje
 Bras e schina, e rompie 'l nas.
 S' ai, ecc.

Tramantrè, pr soa cautela,
 Ai saria nen d' pi bon
 Che fesse tute d' rasparela
 Una grossa provision.
 Che fesse, ecc.

I Vedovi vecchi innamorati.

CANZONE XXXIX.

A m' fa rie quand i penso
 A sti vido annamorà,
 Già tuit gris, e ch' a comenso
 Esse fiap e sgangarà;
 Già tuit gris, e ch' a comenso
 Esse fiap e sgangarà.
 Pur a veulo (ela pa drola!)
 Compari da gilicat,
 E fè i dru con tanta tola,
 Com' a fan d' istà i galat;
 E fè, ecc.

Tnie un poch da ment a core,
 Atilà com' tanti spos,
 A fè visita a le sgnore,
 Aplicandse a fè i grassios.
 A fè, ecc.

S' a son già goblù ant le spale,
 Venta vedie sti bagai,
 Pr le strà tut mal uguale,
 Marcè drit com' tanti pai.
 Pr le strà, ecc.

Pr la barba e l' ampodrura
 L' an un' ora al di impiegà,
 Pr podeje fè figura,
 E curvi i difet dl' età.
 Pr podeje, ecc.